

# Ruka'm carta xutz'ib'aj ri Pablo che riglesia k'o Corinto

*Ri Pablo kuya pan rutzil kiwach ri hermanos e k'o pa ri tinamit Corinto*

<sup>1</sup> Ri'in in Pablo in taqo'n re ri Qanimajawal Jesucristo ma e ri Dios ya'yom wa chak chwe. Ri'in junam ruk' ri hermano Timoteo kaqaya pan rutzil wach alaq, ri alaq utinamit ri Dios re riglesia k'o Corinto, y chike konoje ri hermanos ejeqel chupa ronoje taq ri luwar re Acaya.\*

<sup>2</sup> K'ulu k'u alaq ri unimal rutzil k'u'xaj y ri utzil chomal re ri Qaqaw Dios y re ri Qanimajawal Jesucristo.

*Ri b'ochib'al qak'u'x kuya ri Dios*

<sup>3</sup> ¡Lik nim uq'ij ri Dios, Ruqaw ri Qanimajawal Jesucristo! Ma e Rire ri lik kuk'ut ri k'axna'b'al uk'u'x chiqe y ruk' Rire kape wi ri b'ochib'al qak'u'x.

<sup>4</sup> Rire e kab'ochi'in qak'u'x chwach ronoje k'axk'ob'ik, cha' jela' ri'oj utz kaqab'ochi'ij kik'u'x ri e k'o chupa ronoje k'axk'ob'ik. Kaqaya k'u ri b'ochib'al k'u'xaj jela' pacha' ri uya'om ri Dios chiqe ri'oj.

<sup>5</sup> Ma echiri' kanimar ri k'axk'ob'ik paqawi' ruma oj re ri Cristo, e lik kanimar ri b'ochib'al k'u'xaj kuya ri Cristo chiqe.

---

\* **1:1** Corinto e jun tinamit k'o pa ri luwar re Acaya.

**6** Echiri' ri'oj kaqatij k'ax ye yey ri Dios kub'ochi'ij qak'u'x, wa' kuk'am lo b'ochib'al k'u'xaj y kolob'etajik re ri Dios che ralaq. Jek'ula' ri k'ax qatijom y ri b'ochib'al k'u'xaj qak'ulum ri'oj, lik k'o kutiqoj che alaq cha' jela' kach'ij alaq uchuq'ab' ri k'axk'ob'ik pacha' ri qik'owib'em ri'oj.

**7** Lik qajikib'am k'u uwach ri kub'ulib'al qak'u'x uk' alaq. Ma qeta'am alaq jun quk' ri'oj chupa ri k'axk'ob'ik, jek'ula' alaq jun quk' ri'oj che uk'ulik ri b'ochib'al k'u'xaj kuya lo ri Dios.

**8** Kaqaj k'ut, hermanos, keta'maj alaq janipa chi k'axk'ob'ik xqik'owib'ej chila' Asia. Ruma wa unimal k'axk'ob'ik xpe paqawi', xqana'o na jinta chi qachuq'ab' che uch'ijik wa' y xqach'ob'nenare' na jinta chi pa saq kojk'asi'ik.

**9** E xqana' ri'oj e pacha' q'atom chi tzij re kamik paqawi'. Pero k'o xutiqoj chiqe ri xqik'owib'ej, ma ruk' wa' xqamajo na jinta uchak ri kakub'i' qak'u'x chiqib'il qib'; xew e kub'ul qak'u'x ruk' ri Dios, ri keb'uk'astajisaj lo ri ekaminaq.

**10** Ri Dios e xojesan chwa wa kamik ye yey k'a katajin ne che qato'ik. Kub'ul k'u qak'u'x ruk', ma qeta'am ruk' ruto'b'al Rire kojel pan chi utz wo'ora y chiqawach apanoq.

**11** Y ralaq kojto' ne alaq echiri' ka'an alaq orar paqawi' chwach ri Dios. Jek'ula' we e k'i ri xeb'anaw re wa', e k'i ri' ri ketioxin chwach ri Dios ruma ri ku'an Rire quma ri'oj.

*Ri Pablo kuq'alajisaj su'b'e na xik'ow ta Corinto*

**12** K'o ri kuya ki'kotemal chiqe; wa' e ri qab'inik qasilab'ik qak'utum chiwach ralaq y chikiwach

konoje ri winaq, ma kaqana' chiqak'u'x lik saqil y jusuk' ri qab'inik jela' pacha' ri karaj ri Dios. Yey wa qa'anom na e ta ruma unimal na'oj re ruwachulew; e ruma ruto'b'al ri Dios quk'.

<sup>13</sup> Janipa ri kajilaj alaq che ri qacartas, lik e qana'oj ri' che alaq cha' jela' kamaj alaq usuk'.

<sup>14</sup> Wo'ora majom alaq usuk' jub'iq' puwi ri qa'anom; qoye'em k'u ri q'ij echiri' kamaj alaq usuk' ronoje, cha' jela' pa ruk'unib'al ri Qanimajawal Jesucristo lik kaki'kot alaq chiqe ri'oj, jela' pacha' ri'oj kojki'kot che ralaq.

<sup>15</sup> Ruk' k'u wa kub'ulib'al nuk'u'x uk' alaq, xuaj kinik'ow nab'e uk' alaq cha' jela' kalaj kak'ul alaq ri relej nuk'u'x,

<sup>16</sup> ma xinch'ob'o kinik'ow uk' alaq echiri' kin'ek Macedonia y kinik'ow tanchik echiri' kanmaj b'i nub'e Judea y jela' kinto' b'i alaq che ri nub'enam.

<sup>17</sup> Jela' ri xinch'ob'o kan'ano, tob' na e ta xu'ana'. Ruma k'u la', laj chiwach ralaq na xinch'ob' ta chi utz sa' ri kan'ano. ¿Xa nawi pa we ri'in kanch'ob' raqan ri kan'ano? ¿O xa nawi keb' uwa ri nuch'a'tem, pacha' junoq kub'i'ij: «Lik jikil uwach kin'ek,» tob' reta'am chirib'il rib' na ke'ek taj?

<sup>18</sup> No'j ri'in na je ta la' kan'ano. Ma ruma lik jusuk' ri Dios quk', na utz ta k'u ri' we ri qach'a'tem keb' uwach ke'elawi chiwach alaq.

<sup>19</sup> Jek'ula' ri Qanimajawal Jesucristo, Ruk'ajol ri Dios, ri xojtzijon puwi' che alaq junam kuk' ri Silvano y ri Timoteo, ruch'a'tem Rire na keb' ta uwach ke'elawi; ma ronoje ri kub'i'ij lik qatzij.

<sup>20</sup> Yey ruma Rire e ku'ana janipa taq rub'l'i'tisinik ri Dios quk'. E uwari'che kaqayak uq'ij ri Dios,

kaqab'i'ij «Are'» y «Amén» che ronoje ri ub'i'im lo chique.

<sup>21</sup> Yey e ri Dios ri kujikib'a' qak'u'x chi utz ruk' ri Cristo junam uk' alaq y xojucha'o cha' koju'an re Rire.

<sup>22</sup> Ek'u Rire uya'om ri Ruxlab'ixel pa qanima', k'utub'al re oj k'o chi puq'ab' yey ku'ana na k'u ronoje ri ub'i'tisim lo chique.

<sup>23</sup> Lik karil ri Dios ri k'o pa wanova' y reta'am k'ut su'b'e na xinik'ow ta chila' Corinto pacha' ri xinch'ob'o. E ma na xuaj taj kok b'is chik'u'x alaq rumá kanch'a'b'ej pa alaq.<sup>†</sup>

<sup>24</sup> Na e ta k'u koje'taqana pawi' alaq chwi ri kojom alaq; ma rumá ri kub'ulib'al k'u'x alaq, tikil alaq chi utz. Ri kaqa'ano e kojchakun uk' alaq cha' kak'oji' ri ki'kotemal pa anima' alaq.

## 2

<sup>1</sup> Ruma k'u la', xinch'ob'o na kinopon ta tanchi uk' alaq, ma na xuaj taj kanya alaq pa b'is.

<sup>2</sup> Ma we ri'in kanya alaq pa b'is, ¿china chi k'u ri' kaya'w ki'kotemal chwe ri'in? Na jinta k'u nuki'kotemal ri' we nuya'om alaq pa b'is.

<sup>3</sup> Ruma k'u ri' xintz'ib'an pan che alaq,\* cha' we xinopon uk' alaq, na kinya ta alaq pa b'is, ma ki'kotemal ri kanwoy'ej che alaq. Lik k'ut kub'ul nuk'u'x uk' onoje alaq, ma wetam e janipa ri kuya ki'kotem chwe ri'in, kuya ki'kotem che ralaq.

---

† **1:23** Ri Pablo xuto k'o jun hermano chila' Corinto xmakunik y ri nik'aj hermanos na xeb'ok ta il che wa mak. Kil 1 Corintios 5:1. E uwari'che na xraj taj kopon kuk' we k'amaja' kakiyib'a' wa'. Ek'u ri xu'ano, e xtz'ib'an pan chike cha' kakiyib'a' wa' y jela' rire utz kopon kuk' ruk' utzil chomal. \* **2:3** Kil nota 2 Corintios 1:23.

<sup>4</sup> Na xa ta jub'iq' ri k'ax y ri paxib'al k'u'x xinik'ow wi echiri' ruk' oq'ej xintz'ib'an pan che alaq. Na xin'an ta k'u wa' cha' kanya alaq pa b'is, ma e xin'ano cha' keta'maj alaq lik nim ri rutzil nuk'u'x che alaq.

### *Kuyu alaq umak rijun xutzelej utzij*

<sup>5</sup> Xintz'ib'an k'u pan puwi ri jun xinuya ri'in pa b'is rumak u'anom. Y na xew ta ri'in, ma laj ne uya'om onoje ralaq pa b'is. (Kamb'i'ij "Laj" cha' na lik ta k'ax katataj wa nuch'a'tem.)

<sup>6</sup> Ku'an na k'u la' janipa ri x'an alaq che wa jun tikawex echiri' xq'at alaq tzij puwi', ma ruk' wa' xutzelej utzij.

<sup>7</sup> Ek'u ri taqal che ka'an alaq wo'ora e kuyu alaq umak y b'ochi'ij alaq uk'u'x cha' jela' na kasach ta rumak runimal ub'is.

<sup>8</sup> Kantz'onoj k'u ko che alaq k'utu tanchi alaq ri rutzil k'u'x alaq che.

<sup>9</sup> Ri xuaj ri'in ruk' wa carta e kanwilo we kok alaq il che ronoje ri nupixab'anik.

<sup>10</sup> We ralaq kakuy alaq umak junoq, jela' ri'in kankuy umak. We k'o k'u kajawax wi kakuy umak, ri'in nukuyum chi umak uma ralaq y chupa rub'i' ri Cristo.

<sup>11</sup> Kan'an k'u wa' cha' ri Satanás na kumaj ta uchuq'ab' paqawi', ma lik qeta'am chi runo'jib'al chiqij.

### *Ri Pablo xraj kuto sa'u'anom riglesia k'o Corinto*

<sup>12</sup> Echiri' xinopon chupa ri tinamit Troas che utzijoxik ri Utzilaj Tzij re ri Cristo, lik chom ri jeqeb'al re ri nuchak xuya ri Qanimajawal chwe;

**13** na ruk' ta k'u ri', na xkub'i' ta ri wanima', ma na xinriq ta ri hermano Tito chila'. Ruma k'u ri', xeb'enuya kan ri hermanos e k'o Troas y ximpe Macedonia cha' ko'l nutzukuj.<sup>†</sup>

### *Ri chomilaj chak uya'om ri Dios chiqe*

**14** ¡Xa maltiox k'u che ri Dios! Ma kojel pan chi utz chwa ronoje ruma ri Cristo, yey ya'tal chiqe kaqaq'alajisaj ruk'u'x Rire. Ma quma ri'oj ke'ek utzijoxik ri Cristo che ronoje luwar, e pacha' kunab'al ki' ruxlab' kamuyuyik.

**15** Oj k'u pacha' kunab'al lik ki' ruxlab' kamuyuyik kopon chwach ri Dios, ma quma ri'oj kaq'alajin ruk'u'x ri Cristo chikiwach ri kekolob'etajik y chikiwach ri katajin kisachik.

**16** Ek'u rutzijoxik kaqa'ano e pacha' utewul kamik chikiwach ri na kakaj ta kakito, ma kuk'am lo kamik pakiwi'. No'j chikiwach ri kek'uluw re, e pacha' kunab'al ki' ruxlab', ma kuk'am lo chomilaj k'aslemal chike. Chwach k'u wa' wa nimalaj chak re ri Dios, ¿china kach'ijow u'anik?\*

**17** Ri'oj na kaqa'an ta pacha' ri kaki'an jujun, ma e k'i ri kijalk'atim Ruch'a'tem ri Dios, xa ki'anom ch'akab'al puaq che rutzijoxik; no'j ri kaqa'an ri'oj chwach ri Dios y pa rub'i' ri Cristo, e kaqatzijoj pa saqil wi ri Tzij uya'om ri Dios chiqe.

## 3

**1** Echiri' kinch'a't chwi ri chak uya'om ri Dios chiqe, na e ta re kantak'ab'a' qaq'ij. Ma ¿kajawax

<sup>†</sup> **2:13** Ri Pablo lik roye'em kirason ri hermanos e k'o Corinto, ma karaj kareta'maj we xutzir ri problema e k'o wi. Kil 2 Corintios 7:5-16.

\* **2:16** 2 Co. 3:5

nawi kanya juna carta chiwach alaq, k'utub'al re ri chak qa'anom? ¿Kajawax nawi kantz'onoj che alaq katz'ib'aj alaq juna carta kub'l'ij we utz ri chak qa'anom? Laj k'o jujun kajawax wa' chike, pero ri'oj na kajawax ta chiqe;

<sup>2</sup> ma e ralaq ri alaq qacarta, alaq k'utub'al re ri qachak qa'anom. Lik tz'ib'ital k'u pa qanima' janipa ri u'anom ri Dios uk' alaq quma ri'oj, yey wa chak lik kaq'alajin chikiwach konoje ri tikawex ruma ri k'ak' b'inik silab'ik alaq.

<sup>3</sup> Lik k'ut q'alaj e alaq k'utub'al re ri qachak qa'anom, e pacha' alaq jun carta tz'ib'ital ruma ri Cristo. Yey wa' wa carta na ruk' ta tinta tz'ib'ital wi, e ruma ri Ruxlab'ixel ri Dios k'aslik; y na chwa ta ne jutaq pera'j ab'aj xtz'ib'ax wi pacha' u'anom ojertan,\* ma tz'ib'ital chupa ri kanima' ri tikawex.

<sup>4</sup> Ruma k'u ri u'anom ri Cristo quk', kaqajikib'a' uwach ri kaqab'i'ij puwi ri qachak yey ri Dios reta'am lik qatzij wa'.

<sup>5</sup> We ta e la' xa qatukel, na kaqach'ij ta u'anik wa chak, ma qeta'am xew ruk' ri Dios petinaq wi ri qana'oj y qachuq'ab' che u'anik ruchak Rire.

<sup>6</sup> Ek'u ri Dios mismo ri xya'w wa chak chiqe, uya'om qana'oj y qachuq'ab' re kaqaq'alajisaj chi utz ri k'ak' tzij ku'an Rire kuk' ri tikawex. Yey na ku'an ta wa' ruma qataqem taqanik, ma e ruma ri ku'an ri Ruxlab'ixel ri Dios pa qanima'. Ma ri taqanik kuk'am lo q'atb'al tzij re kamik paqawi', no'j ri kuya ri Ruxlab'ixel ri Dios chiqe e k'aslemal.\*

### *Ri k'ak' tzij*

---

\* **3:3** Éx. 24:12    \* **3:6** Ez. 11:19-20

**7** Ri taqanik tz'ib'ital kan chwa ab'aj kuk'am lo kamik, pero lik k'o uchomalil. Ma lik xwon rupalaj ri Moisés echiri' xuk'ul wa taqanik, k'utub'al re ruchomalil Rutzij ri Dios. Yey ri e aj Israel na utz ta xkitzu' uwach ri Moisés rumá wa' wa wonib'al,\* yej wa' xa xik'owik.

**8** We k'o k'u uchomalil ri taqanik xuya lo ri Dios ojertan, jjanipa k'u lo ri' ruchomalil ruchak ri Ruxlab'ixel ri Dios ku'an quk'!

**9** We k'o k'u uchomalil wa taqanik, ri xuq'alajisaj ri q'atb'al tzij re ri Dios pakiwi ri tikawex rumá ri kimak, jjanipa k'u lo ri' ruchomalil ri jun chik tzij, ri kuk'ut chiqe su'anik koju'an jusuk' chwach ri Dios!

**10** Ri taqanik xuya ri Dios ojertan k'o uchomalil, pero ruchomalil wa' na kajunimax ta k'ana ruk' ri k'ak' tzij.

**11** Rupalaj ri Moisés xwon xa pa joq'otaj rumá ruchomalil ri Tzij xuya ri Dios che; pero jmás k'o uchomalil ri' ri k'ak' tzij, ma wa' na kasach taj!

**12** Ruma lik kub'ul qak'u'x che wa na kasach taj, ri'oj lik kaqaq'alajisaj chi utz ri k'ak' tzij y na jintza kaqewaj che.

**13** Na e ta pacha' rojertan echiri' ri Dios xuya ri taqanik che ri Moisés, ma rire xuch'uq rupalaj rumá lik xwonik, cha' ri e aj Israel na kakitzutza' ta ruwonib'al, ri xa kik'owik.\*

**14** Ek'u rike na xkaj ta kakimaj usuk' Rutzij ri Dios y k'a e ne waq'ij ora echiri' kakajilaj wa Tzij Pixab' xuya ri Dios ojertan, na kakimaj ta usuk'; e pacha' ch'uqatal ri kiwach. Yey wa' wa

\* **3:7** Éx. 34:29    \* **3:13** Éx. 34:29-35

ch'uquyum ri kiwach, xew ri Cristo kesan re chike.

<sup>15</sup> K'a waq'ij ora nenare' echiri' kakajilaj wa Tzij Pixab' tz'ib'ital kan ruma ri Moisés, e pacha' ch'uqutal ri kiwach y ruma la' na kaq'alajin ta ri Q'ijsaq chikiwach.\*

<sup>16</sup> No'j echiri' junq kutzelej utzij chwach ri Qanimajawal, kesax na k'u ri' ri ch'uquyum ruwach.

<sup>17</sup> Ri Qanimajawal e junam ruk' ri Ruxlab'ixel ri Dios;† y china ri k'o ri Ruxlab'ixel ri Qanimajawal pa ranima', na jinta chi chuxe' rutaqanik junq chik.

<sup>18</sup> Qonoje ri'oj na ch'uqutal ta chi ri qawach. E uwari'che, kaqil chi utz ruchomalil ri Qanimajawal y kojwolq'in che uq'alajisaxik wa' ruk' ri qab'inik qasilab'ik. Ma jalan katajin qajalk'atixik cha' jela' koju'ana pacha' ri Qanimajawal. Yey ri Ruxlab'ixel Rire e ri ka'anaw re wa' quk'!

## 4

*Ri Pablo kuq'alajisaj ri chomilaj Q'ijsaq re ri Dios*

<sup>1</sup> Ruma k'u wa' na kapax ta qak'u'x che u'anik wa chak, ma wa' ya'tal chiqe ruma ri rutzil uk'u'x ri Dios.

<sup>2</sup> Ri'oj na jinta k'o kaqa'an xa xe'laq'ay y k'ixb'al uwach, na keqasok tane ri tikawex yej na kaqakoj tane uwi' ri kub'i'ij Rutzij ri Dios. Ma e kaqak'ut pa saqil wi ri Q'ijsaq cha' jela' konoje ri ketaw re, kaketa'maj lik jusuk' ri kaqa'ano.

\* **3:15** Wa' e ke'elawi na kakimaj ta usuk' ri Q'ijsaq. † **3:17** Ri Qanimajawal y ri Ruxlab'ixel ri Dios junam kik'u'x y junam kina'oj.

**3** Yey we k'o kakich'ob'o na q'alaj ta ri Utzilaj Tzij, wa' e chike ri katajin usachik kiwach.

**4** Rike na kakikoj ta ri Utzilaj Tzij ma sachisam ri kina'oj rumá ri jun kataqan che ruwachulew; wa' e ritzel winaq, ri xu'an pacha' potz' chike cha' na kakil ta ri chomilaj Q'ijsaq re ri Cristo, ri kuk'utub'ej uwach ri Dios.

**5** Na e ta k'u kaqatzijoj qib' ri'oj; ri kaqatzijoj e ri Jesucristo e Taqanel pakiwi konoje yey ri'oj xa oj nimanel e alaq, ma e karaj ri' ri Jesús chiqe.\*

**6** Ma ri Dios ri xtaqan che xwon ri q'ijsaq chupa ri q'equ'm,\* e Rire ri xwon chupa ri qanima' cha' ruk' la' kaqeta'maj runimal uchomalil Rire, ri kaq'alajin rumá ri Cristo.\*

### *Mapax qak'u'x tob' kojik'ow pa k'axk'ob'ik*

**7** Ri Q'ijsaq re ri Dios e jun nimalaj b'eyomalil, yey uq'alajisam wa' chiqe tob' ri'oj xa oj ulew poqlaj. Jela' xu'ano cha' kaq'alajin wa': Ri unimal chuuq'ab' k'o quk', na qe ta ri'oj, ma ruk' ri Dios kape wi.

**8** Tob' kape k'u uk'iyal uwach k'axk'ob'ik paqawi', kojel na chupa. Tob' k'o ubl'is qak'u'x, na kapax ta qak'u'x che.

**9** Tob' kojternab'ex ruk' k'ax, ri Dios na oj roq'otam taj. Tob' ne kojmach'ax pulew, na kak-isach ta qawach.

**10** Pa taq koj'ek wi, ri qacuerpo xaqi chwach ri kamik k'o wi, jela' pacha' ri xuk'ulumaj ri Jesús;

---

\* **4:5** Lc. 22:27    \* **4:6** Gn. 1:2-3    \* **4:6** "Kaq'alajin rumá ri Cristo": Pa rich'a'tem griego kub'i'ij "che rupalaj ri Jesús". Mt. 17:2; Jn. 8:12

yey kojik'ow chupa wa' cha' ruk' ri qab'inik qasilab'ik kaq'alajin ruk'aslemał ri Jesús.<sup>†</sup>

**11** Wa oj k'o wara che ruwachulew, xaqi katewun ri kamik paqawi' ruma oj aj chak re ri Jesús; yey kojik'ow chupa wa' cha' kilitaj ruk'aslemał ri Jesús che ri qacuerpo, tob' ri qacuerpo na jinta ukowil ma xa kakamik.

**12** Jela' k'u ri' ri kamik k'o paqawi' ri'oj; yey ruma wa', ralaq riqom alaq ri chomilaj k'aslemał re ri Dios.

**13** Ek'u Rutzij Upixab' ri Dios kub'i'ij:  
Xkub'i' nuk'u'x ruk' ri Dios,  
e uwari'che xinq'alajisaj Rutzij Rire. *Sal. 116:10*  
Jek'ula' ri'oj kub'ul qak'u'x ruk' ri Dios; e uwari'che kaqatzijoj rub'i'.

**14** Qeta'am k'ut e ri xk'astajisan lo re ri Qanima-jawal Jesús chikixo'l ri ekaminaq, jela' ku'an chiqe ri'oj; kojuk'astajisaj y junam uk' alaq kojuk'am b'i ruk' Rire.

**15** Ronoje k'u wa qik'owib'em e uma ralaq, cha' jela' kak'iyan kiwach ri kek'uluw re ri unimal rutzil uk'u'x ri Dios. Yey wa' e re yakb'al uq'ij ri Dios, ma jela' lik e k'i ri kakitioxij ri unimal rutzil uk'u'x ri Dios pakiwi'.

**16** E uwari'che na kapax ta qak'u'x, tob' ne wa qacuerpo katajin uri'job'ik; no'j ruk'u'xib'al ri qak'aslemał na je ta la' u'anom, ma jalan kak'ojoj ne más qachuq'ab' ri jujun q'ij.

**17** Janipa taq wa k'ax kaqatij che ruwachulew xa kik'owik, yey wa' lik k'o kutiqoj che ri qab'inik qasilab'ik y che ri chomilaj qak'aslemał chila'

<sup>†</sup> **4:10** Echiri' kaqach'ij uchuq'ab' taq ri k'axk'ob'ik, kaq'alajinik e ruma ruchuq'ab' y ruto'b'al ri Jesús quk'.

chikaj, ri na jinta utaqexik y na jinta k'ana kajunimax wi.

<sup>18</sup> Ek'u ri'oj na kaqaya ta qak'u'x che ri kilitaj wara che ruwachulew, e kaqaya qak'u'x che ri na kilitaj taj; ma ronoje ri kilitaj uwach xa kak'isik, no'j ri na kilitaj ta uwach na jinta utaqexik rukowil.

## 5

### *Ri qocho k'o chila' chikaj*

<sup>1</sup> Qeta'am k'ut ri qacuerpo wara che ruwachulew e jela' pacha' juná rancho na jinta ukowil oj jeqel chupa. Yey echiri' kasach uwach ri qacuerpo, kaya'taj jun qocho chila' chikaj na jinta utaqexik rukowil, ma na uq'ab' ta achi 'anayom re, e ri Dios 'anayom re.

<sup>2</sup> Y ruma la' koj-jilow wo'ora, ma lik kaqaj chik kojq'ax chupa ri qocho chila' chikaj.

<sup>3</sup> Ma echiri' kojq'ax chupa wa!, lik kojch'uqutaj chi utz.\*

<sup>4</sup> Ruma k'u la', ri oj jeqel chupa ri "qarancho" wara che ruwachulew, koj-jilowik y kab'ison qak'u'x; ma na kaqaj taj kaqaya kan ri qacuerpo e la' xa jela'; ri kaqaj e kaqak'ul ri qacuerpo chila' chikaj y jela' kajalk'atix uwach ri na kakowin taj ruk' ri na kakam taj.

<sup>5</sup> Yey wa' e uch'ob'om chi lo ri Dios chiqe; y e Rire ya'yom ri Ruxlab'ixel chiqe, k'utub'al re kuya na janipa ri ub'i'tisim.

<sup>6</sup> Ruma k'u la', lik kub'ul qak'u'x, tob' qeta'am echiri' k'a oj jeqel pa ri qacuerpo wara che

---

\* <sup>5:3</sup> "Kojch'uqutaj chi utz": Pa ri ch'a'tem griego kub'i'ij "na oj ta ch'analik".

ruwachulew, wa' e ke'elawi k'amaja' koje'jeqela pa ri qocho chila' chikaj ruk' ri Qanimajawal Jesucristo.

<sup>7</sup> Ronoje k'u ri kaqa'ano e ruma ri kub'ulib'al qak'u'x ruk' Rire, na e ta ruma ri kaqil ruk' ri qawach.

<sup>8</sup> Lik kub'ul k'u qak'u'x ruk' Rire. Yey e ne lik kaqaj chik kaqaya kan wa qacuerpo cha' jela' koje'jeqela chila' ruk' ri Qanimajawal.

### *Chiqawach apanoq kaq'alajin janipa ri qa'anom*

<sup>9</sup> Ruma k'u la', e kaqaya qib' che u'anik janipa ri karaj ri Qanimajawal, cha'jela' kaki'kot Rire quk' tob' k'a oj k'o wara che ruwachulew o echiri' oj k'o chi ruk' chila' chikaj.

<sup>10</sup> Ma kopon na ri q'ij echiri' qonoje koje'tak'ala chwach ri q'atb'al tzij re ri Cristo, pa kaq'alajin wi we ri qa'anom wara che ruwachulew k'o uchak o na jinta uchak, y kaya'taj k'u chiqe chiqajujunal ri tojb'al re ri qa'anom.

### *Ri Pablo keb'upixab'aj ri tikawex cha'kek'oji'chi utzil chomal chwach ri Ðios*

<sup>11</sup> Lik qeta'am k'ut, chirajawaxik k'o qaxi'in ib' chwach ri Qajawal; ruma k'u ri', keqapixab'aj taq ri tikawex cha'kakiya kib'puq'ab'ri Ðios. Chwach ri Ðios lik q'alaj sa' ri k'o pa qanima'; ek'u kaqaj ri'oj e kaq'alajin wa' chiwach ralaq.

<sup>12</sup> Na kaqab'i'ij ta wa' che alaq re yakb'al qaq'ij. Ma e kaqaj kaqato' alaq che reta'maxik sa' ri kaqa'ano cha'jela' lik kaki'kot alaq chiqe. Jek'ula' k'o kak'ulub'ej wi alaq uwach chike ri xew keb'ok il che taq ri kilitajik pero na keb'ok ta il che ri k'o pa ranima' junoq.

**13** Ma we pacha' chi oj ch'u'jerinaq, wa' e ruma lik qaya'om qib' che ruchak ri Dios. Yey we lik kaqach'ob' chi utz sa' ri kaqa'ano, wa' e to'b'al e alaq.

**14** Ri rutzil uk'u'x ri Cristo kataqan pa qanima' ma lik qeta'am echiri' xkam Rire pakik'axel konoje, e ke'eloq xekam konoje ruk'!

**15** Xkam k'u ri Cristo pakik'axel konoje ri tikawex cha'e janipa ri e k'as ruma rukamik Rire na kaki'an ta chi sa' ri kakaj rike, ma e kaki'an janipa ri karaj ri Jun ri pakik'axel rike xkamik y xk'astaj lo chikixo'l ri ekaminaq.

**16** Wo'ora ri kaqach'ob' puwi junog, na e ta ruma ri kaqil che, pacha' ri kaki'an ri tikawex re ruwachulew. Tob' ne oyertan jela' xqach'ob' lo ri'ojoj puwi ri Cristo, pero wo'ora na kaqa'an ta chi wa' ma xqeta'maj uwach chi utz.

**17** Jek'ula' we junog uya'om rib' puq'ab' ri Cristo, e jun k'ak' tikawex. Junwi karil ronoje, ma ri re oyertan xkanaj kanoq y ronoje u'anom k'ak' ruk'.

**18** Ronoje wa' ruk' ri Dios petinaq wi, ma xojuya chi utzil chomal chwach Rire ruma ri xu'an ri Cristo y xuya k'u chiqe keqato' ri tikawex cha' kek'oji' chi utzil chomal chwach.

**19** Wa' e ke'elawi ruma rukamik ri Cristo, ri Dios kuya chike ri tikawex kek'oji' chi utzil chomal chwach Rire ma kukuy ri kimak. Y xuya k'u chiqe ri'ojoj rub'i'xikil chikiwach ri tikawex wa tzij re ri utzil chomal.

**20** E uwari'che oj taqom lo ruma ri Cristo. Ma quma ri'ojoj ri Dios lik kelaj chike ri tikawex cha' keqib' ruk'. Kojelaj k'u pa rub'i' ri Cristo, jewa' kaqab'i'ij: «Yib'a' ib' alaq chwach ri Dios cha'

kak'oji' alaq chi utzil chomal chwach.»

**21** Tob' ri Cristo na jinta k'ana mak xu'ano, na ruk' ta k'u ri', quma ri'oj ri Dios xu'an che xreqaj ronoje ri qamak cha' jela' koju'an jusuk' chwach ri Dios rumá xa oj jun ruk' Rire.

## 6

**1** E uwari'che ri'oj, ri oj aj chak re ri Dios, lik kaqapixab'aj alaq: Ma'an alaq ri pacha' na il ta uwach ri unimal rutzil uk'u'x ri Dios uk'utum chiwach alaq.

**2** Ma jewa' ub'i'im kan ri Dios pa Ruch'a'tem:  
Chupa ruq'ijol echiri' xajawax to'b'al awe, xat-  
into'o;  
Chupa ri q'ij re kolob'etajik, xatinkolob'ej *Is. 49:8*  
kacha ri Dios.

Kamb'i'ij k'u che alaq: E uq'ijol wa' echiri'  
ri Dios kub'i'tisij ruto'b'al; wo'ora e q'ij re  
kolob'etajik chike ri tikawex.

### *Ri qab'inik qasilab'ik ri oj aj chak re ri Dios*

**3** Kaqachajij k'u qib' chi utz che ri kaqa'ano cha'  
na oj ta latz'anel chike jujun chik y jela' na jinta  
junoq kak'aqaw b'i uq'ij ruchak ri Dios kaqa'ano.

**4** Ruk' ronoje ri kaqa'ano e kaqak'utu oj aj  
chak re ri Dios. Kaqakuy k'u ronoje ruk' unimal  
qak'u'x, tob' oj k'o pa k'ax, pa nib'a'il o pa b'is;

**5** tob' kab'alak'ux qapa o kojk'am b'i pa cárcel,  
tob' kakiyak kib' ruk'iyal winaq chiqij; tob' kaqatij  
k'axlaj chak, kaqakuy waram o kaqatij numik.

**6** Yey kaqak'utu oj aj chak re ri Dios ma chom  
ri qab'inik, k'o runa'oj ri Dios quk', k'o unimal  
qak'u'x y k'axna'b'al qak'u'x, k'o ri Santowilaj

Ruxlab'ixel ri Dios quk' y k'ax keqana' konoje ruk'  
ronoje qak'u'x.

<sup>7</sup> Kaq'alajinik oj aj chak re ri Dios ma kaqatzijoj  
ri saqil k'utunik, k'o ruchuq'ab' ri Dios quk' y  
kaqa'an ri lik usuk' y jek'ula' kaqach'ij kichuq'ab'  
konoje ri keyaktaj chiqij.\*

<sup>8</sup> Qak'ulum yakb'al qaqq'ij y k'aqib'al b'i qaqq'ij; e  
k'o ri chom kech'a't chiqij y e k'o ri tzel kech'a't  
chiqij. Kab'l'i'x chiqe oj aj raq'ul, tob' na jinta  
raq'ub'al kaqa'ano.

<sup>9</sup> Tob' e k'i keta'am oj aj chak re ri Dios; na ruk'  
ta k'u ri', e k'o jujun kaki'an pacha' na keta'am ta  
wa'. Xtewun ne ri kamik paqawi'; na ruk' ta k'u  
ri', k'a oj k'aslik. Tob' lik xojya' pa k'ax, pero na oj  
kaminaq taj.

<sup>10</sup> K'o q'ij oj ya'om pa b'is; na ruk' ta k'u ri',  
xaqi kojki'kotik. Na oj ta b'eyom; na ruk' ta k'u  
ri', qaya'om rub'eyomalil ri Dios chike uk'iyal  
tikawex. Wara che ruwachulew na jinta k'o quk';  
na ruk' ta k'u ri', e ri Dios uya'om ronoje ri ka-  
jawax chiqe.

<sup>11</sup> Alaq qa hermanos aj Corinto, ronoje  
xqaq'alajisaj lo chiwach alaq, na jinta k'ana  
xqewaj chiwach alaq. Lik qak'utum che alaq  
ri k'axna'b'al qak'u'x k'o pa qanima'.

<sup>12</sup> Eta'am alaq ri'oj lik qak'utum ri rutzil qak'u'x  
che alaq, no'j ralaq na je ta la' ka'an alaq chiqe  
ri'oj.

<sup>13</sup> Ek'u wo'ora kinch'a't uk' alaq pacha' alaq  
walk'o'al: Jela' pacha' ri'oj lik qak'utum ri rutzil  
qak'u'x che ralaq, jek'ula' 'ana alaq chiqe ri'oj.

---

\* <sup>6:7</sup> Ef. 6:16-17

*Qa'ana chom che ri qab'inik qasilab'ik ma oj rocho ri Dios*

<sup>14</sup> Hermanos, mak'ulaj ib' alaq kuk' ri na kiko-jom ta rub'i' ri Cristo, ma ri jusuk' na kuk'ulaj ta rib' ruk' ri na jusuk' taj y ri q'ijsaq na kuk'ulaj ta rib' ruk' ri q'equ'm.

<sup>15</sup> ¿Yey ri Cristo ruk' ri Belial\* k'o nawi utzil chikiwach? ¿O sa' ri utz kuriq junooq ukojom rub'i' ri Cristo che junooq na ukojom taj?

<sup>16</sup> Ri rocho ri Dios na kuk'ulaj ta rib' ruk' taq ri tiox. Jek'uri'la' ralaq na jinta chi e alaq kuk' ri tiox, ma ralaq alaq rocho ri Dios k'aslik. E pacha' rub'i'im Rire:

Kinjeqi' kuk' y chikixo'lib'al rike kimb'in wi.

In k'u Ri'in ki Dios y rike e nutinamit\* *Lv. 26:12; Ez. 37:27*

xcha!.

<sup>17</sup> E uwari'che ri Dios jewa' kub'i'ij pa Ruch'a'tem:

Chixel chikixo'lib'al ri e aj mak y chiwesaj iwib' kuk'.

Mich'ulaj iwib' ruk' ri na chom taj chwach ri Dios, y jela' Ri'in kixink'ul chi utz. *Is. 52:11; Ez. 20:41*

<sup>18</sup> Kinu'an k'u Iqaw ri',  
yey ri'ix kixu'an ix walk'o'al *2 S. 7:14*  
kacha ri Qajawxel, ri k'o ronoje unimal chug'ab'  
puq'ab'.

## 7

<sup>1</sup> E uwari'che, hermanos, ruma taq wa b'i'tisinik u'anom lo ri Dios chiqe, qajosq'ij qib' che taq ri mak retzelam ri qacuerpo y ri qanima!. Ruk'

---

\* **6:15** "Belial": Wa' e jun ub'i' ritzel winaq. \* **6:16** 1 Co. 3:16;  
6:19

jun xi'in ib' chwach ri Dios qachuq'ub'ej qib' che uchomaxik ri qab'inik qasilab'ik chwach ri Dios.

*Ri Pablo kaki'kot ruma ri xuta che riglesia k'o Corinto*

<sup>2</sup> Chojk'ola ko chik'u'x alaq; ma ri'oj na jinta junq qa'anom ri na usuk' taj che, na jinta junq tzaqinaq pa mak quma ri'oj yey na jinta junq qasokoso'm.

<sup>3</sup> Ek'uchiri' kamb'i'ij wa', na e ta re kanya k'ix alaq; ma pacha' ri nub'i'im lo che alaq, lik k'o alaq pa qanima'. Tob' k'u oj k'as ri' o tob' ne oj kaminaq chik, xa jun qak'u'x uk' alaq.

<sup>4</sup> Lik kanq'alajisaj ri k'o pa wanima' chiwach alaq, ma lik kub'ul nuk'u'x uk' alaq. Lik kinki'kot che alaq. E ne ralaq ri xnimarisan nuk'u'x y wo'ora nojinaq ri wanima' che ki'kotemal tob' oj k'o pa taq k'axk'ob'ik.

<sup>5</sup> Chwi xojk'un Macedonia, paqatzij wi na oj uxlaninaq taj. Ma tob' xa pa taq xpe wi ri k'ax paqawi', xpe taq ch'a'oj chiqij y lik xok xi'in ib' pa qanima'.

<sup>6</sup> Pero ri Dios, ri b'ochi'inel ke ri paxinaq kik'u'x, e xb'ochi'in qak'u'x ruma ruk'unik ri hermano Tito quk'.

<sup>7</sup> Na xew ta k'u ruma ruk'unib'al xojki'kotik; e lik xojki'kotik ma xqato rire lik xki'kot ri ranima' uma ralaq. Ma xub'i'ij chiqe e lik ka'aj alaq kil alaq nuwach, lik kab'ison alaq ruma inya'om alaq pa b'is y lik ka'aj ne alaq kak'ut alaq ri rutzil k'u'x alaq chwe. Ruma taq k'u wa', ri'in más xinki'kotik,

<sup>8</sup> tob' ne xub'isoj nuk'u'x echiri' xintaq b'i ri nab'e nucarta che alaq, ma wa' xukoj alaq pa b'is

keb' oxib' q'ij. Pero na jinta chi kub'i'ij nuk'u'x che, ma weta'am ri carta lik k'o xutiqoj che alaq.

<sup>9</sup> Ek'u wo'ora lik kinki'kotik, na ruma ta ri xb'ison alaq che ri nucarta, ma e ruma ri b'is alaq xuto' alaq cha' katzelej tzij alaq, yey wa b'is e xraj ri' ri Dios che alaq. Jek'ula' na jinta juna k'ax xqa'an ri'oj che alaq.

<sup>10</sup> Ri b'is petinaq ruk' ri Dios e ku'an chiqe kok chiqak'u'x ri qamak, cha' jela' kuk'am lo tzeleb'al tzij y kolob'etajik chiqe y jwa' na kuya ta b'is che junq! No'j ri b'is re ruwachulew xa kuk'am lo kamik.

<sup>11</sup> ¡Chilape k'u alaq ronoje ri utz xuk'am lo ri b'is alaq chwach ri Dios! Ma lik xok alaq il che wa' y x'aj k'u kaq'alajisaj alaq wa' chwe. Ek'u lik xpe oyowal alaq che wa jun mak y lik x'aj k'u kil alaq nuwach. Ruk' ronoje k'u'x alaq y ruk' xi'in ib', xya ib' alaq che u'anik ri utz chwach ri Dios. Ruk' k'u taq ri x'an alaq, wo'ora kaq'alajinik utz 'anom ralaq.

<sup>12</sup> È uwari'che, echiri' xintz'ib'aj b'i ri carta che alaq, xin'ano na xew ta ruma ri jun x'anaw re ri na usuk' taj y na xew tane ruma ri jun x'an ri na usuk' taj che, ma xin'ano e cha' kak'ut alaq chwach ri Dios: Paqtzij wi lik kok alaq il chiqe.

<sup>13</sup> Ruma k'u xok alaq il che ri qacarta, lik xnimar qak'u'x. Yey uwi' chi ri qaki'kotemal ri'oj, e ruki'kotemal ri Tito, ma lik xnimar isaj lo alaq uk'u'x.

<sup>14</sup> Ri'in tuyakom chi q'ij alaq chwach ri Tito y na kink'ix ta che ri nub'i'im. Ma ronoje ri kaqab'i'ij che alaq lik qatzij; jek'ula' ri', janipa ri qab'i'im chi che ri Tito paw'i' ralaq, lik e xe'rila che alaq.

<sup>15</sup> Ek'u ri k'axna'b'al uk'u'x ri Tito che alaq más kanimarik echiri' kak'un chuk'u'x ruk' xi'in ib' pa anima' alaq xk'ul alaq y xya ib' alaq che u'anik janipa ri xub'i'ij che alaq.

<sup>16</sup> Lik kinki'kotik ma che ronoje lik kub'ul nuk'u'x uk' alaq.

## 8

### *Ri qasa'n kaya'i' chike rutinamit ri Dios e k'o Jerusalem*

<sup>1</sup> Hermanos, kaqaj keta'maj alaq ri unimal rutzil uk'u'x ri Dios xkik'ut rutinamit ri Cristo e k'o pa taq ri luwar re Macedonia.

<sup>2</sup> Tob' rike na xa ta jub'iq' ri k'ax kik'owib'em, ri ki'kotemal k'o kuk' na jinta utaqexik. Y tob' lik e nib'a'ib', xik'ow ne uwi' ri xkiya che kito'ik ri kachb'i'il.\*

<sup>3</sup> Ri'in kamb'i'ij ri xinwilo: Ri xkiya'o lik pa kanima' xalax wi. Na xew ta xkiya e chirij ri k'o kuk', ma xkiya ne uwi'.

<sup>4</sup> Lik k'u xeb'elaj che kaqaya luwar chike eb'are jun kekito' pan rutinamit ri Dios ruk' wa qasa'n kamolik.

<sup>5</sup> Janipa k'u ri qoye'em ri'oj chike na xew ta chi xki'an ri', ma nab'e ne xkiya kib' puq'ab' ri Dios, k'a tek'uchiril' xkiya ri kanima' chiqe ri'oj cha'jela' kaki'an janipa ri rajawal uk'u'x ri Dios.

<sup>6</sup> Ruma k'u la' hermanos, xqab'i'ij che ri Tito chuk'isa na utza'm wa chak xujeq uk' ralaq puwi rumolik ri qasa'n, ma wa' e k'utub'al re ri relej k'u'x alaq.

---

\* <sup>8:2</sup> 1 Co. 16:1-4

**7** E lik utz ri 'anom ralaq che ronoje taq wa': lik k'o kub'ulib'al k'u'x alaq ruk' ri Dios, lik kariq alaq utzijoxik Ruch'a'tem ri Dios, ya'tal runa'oj ri Dios che alaq, alaq sak'aj che u'anik ruchak ri Dios yey lik ne k'ax kojna' alaq; jek'uri'la', 'ana alaq chi utz wa jun chak re kito'ik ri nik'aj chik qa hermanos.

**8** Ruk' wa' na kintajin ta che uya'ik jun taqanik che alaq. Ma xew xintzijoj che alaq ri kisak'ajil ri jujun chik che kito'ik ri kachb'i'il, cha' jela' kak'ut alaq paqatzij wi k'ax kena' alaq ri jujun chik hermanos.

**9** Ma lik eta'am chi alaq ri unimal rutzil uk'u'x ri Qanimajawal Jesucristo. Rire lik b'eyom; na ruk' ta k'u ri', rumá ri rutzil uk'u'x che alaq, xu'an nib'a' che rib' cha' ruk' runib'a'il e xuya rub'eyomalil ri Dios che ralaq.

**10** Chwi k'u wa qasa'n kamolik, kanya na'oj alaq puwi ri taqal che ka'an alaq; ma junab'ir xjeq lo alaq umolik wa' yey x'an alaq ruk' ronoje k'u'x alaq.

**11** Ek'u wo'ora k'isa pan alaq utza'm wa' ruk' ronoje k'u'x alaq, jela' pacha' ri xjeqeb'ej lo alaq u'anik. Ya'a k'u alaq janipa ri kach'ij alaq uya'ik.

**12** Ma e junioq lik karaj kaqasanik, ri Dios kuk'ul chi utz ri qasa'n kuya'o e chirij ri k'o ruk'; ma ri Dios na kutz'onoj ta che jun ri na jintu ruk'.

**13** Na kamb'i'ij ta wa' cha' kakanaj kan alaq pa nib'a'il rumá ri keto' alaq jujun chik. Ma e ri karaj e chiqajujunal k'o quk' janipa ri kajawax chiqe.

**14** Wo'ora paq'ab' alaq k'o wi keto' alaq ri e k'o pa k'ax. Taqal k'u che alaq kajach alaq upa ri k'o uk' alaq cha' jela' katz'aqatisaj alaq ri kajawax chike rike. We xopon k'u junta q'ij echiri' ralaq

k'o alaq pa k'ax, ek'uchiri' taqal chike rike kakito' ralaq. We konoje jela' kaki'ano, kaya'taj k'u chike chikijujunal janipa ri kajawaxik.

<sup>15</sup> E jela' pacha' ri tz'ib'ital kan pa Ruch'a'tem ri Dios:

E ri lik k'i xumolo,

na jinta uqax xkanaj kan ruk'

ma xujach chike ri jujun chik;

ye y e ri na k'i ta xumolo,

xaqare' xu'ana pan ruk'

ma ri kajawax che xya'taj ruma jun chik Ex.

<sup>16:18</sup>

kacha!.

### *Ri etaqom b'i che umolik ri qasa'n*

<sup>16</sup> Xa maltiox k'u che ri Dios ma ukojom pa ranima' ri Tito kuto' alaq jela' pacha' kan'an ri'in.

<sup>17</sup> Ma xew ximb'i'ij che ke'rila alaq, na jampatana ruk' ki'kotemal xunimaj ma lik kacha uk'u'x che ke'rila wach alaq.

<sup>18</sup> Junam k'ut ruk' ri Tito kaqataq b'i jun chik hermano cha' karachhb'ilaj b'i. Wa' e jun lik chom ruch'a'tib'exik ka'an pa taq riglesias ruma ri utzilaj chak u'anom che utzijoxik ri Utzilaj Tzij.

<sup>19</sup> Na xew tane wa', ma wa jun hermano cha'om kuma riglesias re kojracchb'ilaj pa taq ri koj'ek wi che umolik y che ujachik wa' wa qasa'n. Wa' wa chak oj k'o wi e re yakb'al uq'ij ri Qanimajawal Jesucristo y e k'utub'al re ri relej qak'u'x.

<sup>20</sup> Ekojom qachb'i'il cha' na jinta k'o kech'a't chiqij che uchapab'exik wu'k'iyal qasa'n k'o paqaq'ab'.

<sup>21</sup> Ri kaqaj ri'oj e kaqa'an ronoje chi utz chwach ri Qanimajawal Jesucristo y chikiwach ri tikawex.

<sup>22</sup> E uwari'che junam kuk' ri keb'ek, kaqataq b'i jun chik hermano. Wa' na xa ta julaj uk'utum lik kacha uk'u'x che uk'iyal chak. Yey wo'ora más ne kacha uk'u'x che wa b'enam ma lik kub'ul uk'u'x uk' alaq.

<sup>23</sup> Ri Tito e wachb'i'il ri'in, junam oj to'b'el e alaq. Yey ri hermanos erachb'ilam b'i, echa'om lo kuma ri tinamit re ri Cristo, ma ruk' ri kib'inik kisilab'ik kiyakom uq'ij ri Cristo.

<sup>24</sup> E uwari'che chek'ulu alaq chi utz cha' jela' kak'ut alaq ri rutzil k'u'x alaq y jek'ula' kaq'alajin chikiwach riglesias su'b'e lik kojki'kot che alaq.

## 9

*Ri Dios karaj keqato' ri nib'a'ib' ruk' ronoje qaku'x*

<sup>1</sup> Puwi k'u wa qasa'n re to'b'al ke rutinamit ri Dios, na kajawax ta chik kantz'ib'aj pan che alaq,

<sup>2</sup> ma weta'am chi ri relej k'u'x alaq re kato'b' alaq. E uwari'che tuyakom q'ij alaq chikiwach ri e aj Macedonia. Ri'in nub'i'im, ri alaq aj Acaya\* k'o chi qasa'n molom lo alaq junab'ir. Yey rumá wa 'anom ralaq, e k'i chike ri e aj Macedonia xkijeq kaki'an ke ruk' ronoje kik'u'x.

<sup>3</sup> E uwari'che eb'enutaqom b'i wa hermanos uk' alaq cha' kakito' alaq che uk'isik umolik ri qasa'n. Ma we yib'am chi alaq ri qasa'n jela' pacha' ri nub'i'im loq, kaq'alajin k'u ri'lik qatzij ri xqab'i'ij echiri' xqayak q'ij alaq.

<sup>4</sup> Ma k'axtaj kinkachb'ilaj b'i jujun aj Macedonia yej we xojopon k'u uk' alaq, ke'qariqa' k'amaja'

---

\* <sup>9:2</sup> Corinto e jun tinamit k'o pa ri luwar re Acaya.

yijb'am alaq ri qasa'n. We e xu'ana ri', k'ixb'al k'u chiqe ri'oj y che ralaq, ma lik xkub'i' qak'u'x uk' alaq yey na x'an ta k'u alaq ri qab'i'im loq.

<sup>5</sup> Ruma k'u wa', xinch'ob'o keb'enutaq b'i uk' alaq wa hermanos cha' kenab'ej b'i chiqawach ri'oj y kakito' alaq che umolik ri qasa'n b'il'tisim chi alaq. Jek'ula' we xojopon ri'oj, yijb'am chi alaq wa'. Kaq'alajin k'u ri' xqasan alaq ruk' ronoje k'u'x alaq y na e ta ruma xtaq alaq che.

<sup>6</sup> Kankuxtaj k'u wa' che alaq: China ri na k'i ta ri kutiko, ri' na k'i ta ri kumolo. Yey china ri lik k'i ri kutiko, ri' lik k'i ri kumolo.

<sup>7</sup> E uwari'che, chijujunal alaq chuya'a ruqasa'n e chirij janipa ri xalax lo pa ranima', na ruk' ta b'is y na ruma ta minom alaq chupa. Ma ri Dios lik kuk'ul uk'u'x ri kuya ruqasa'n ruk' ki'kotemal.

<sup>8</sup> Yey lik k'o puq'ab' ri Dios kuto' alaq cha' kak'iyar janipa ri k'o uk' alaq y jela' k'o ronoje ri kajawax che alaq y na xew ta ri', ma kuya ne uwi' cha' jela' kato'b' alaq che u'anik chomilaj taq chak.

<sup>9</sup> E pacha' ri tz'ib'ital kan chupa Rutzij Upixab' ri Dios:

Xujach ri k'o ruk' re keb'uto' ri nib'a'ib';  
janipa k'u ri utz u'anom  
na kasach ta uwach  
kacha'. *Sal. 112:9*

<sup>10</sup> Ri Dios e kaya'w re rija' che rawanel yey e kaya'w re ri wa che ri kawa'ik. Ek'u ri' Rire kuya na janipa ri kajawax che alaq y kuya ne uwi', cha' ruk' wa' ka'an alaq ri utz y jek'ula' lik k'o kutiqoj ri utzilaj chak ka'an alaq.

<sup>11</sup> Jela' k'u ri', kak'oji' uk'iyal uwach b'eyomalil uk' alaq cha' ruk' wa' kato'b' alaq ruk' ronoje k'u'x

alaq. Y ek'uchiri' ri'oj kaqak'am b'i wa qasa'n chike ri e k'o pa k'axk'ob'ik, rike kakitioxij che ri Dios.

<sup>12</sup> Ek'u wa' wa to'b'al na xew ta kutz'aqatisaj ri kajawax chike, ma e kukoj pa kanima' rike ri lik ketioxin chwach ri Dios

<sup>13</sup> y jela' ri kek'uluw re wa qasa'n lik kakiyak uq'ij ri Dios. Ma wa' e k'utub'al re paqatzij wi xkoj alaq ri Utzilaj Tzij re ri Cristo y kab'in alaq chupa wa', yey e k'utub'al re ri relej k'u'x alaq chike rike y chike konoje rutinamit ri Dios.

<sup>14</sup> Jek'ula' rike k'utub'al re ri rutzil kik'u'x che alaq, kaki'an orar pawi' alaq ruma ri unimal rutzil uk'u'x ri Dios kilom che alaq.

<sup>15</sup> ¡Xa maltiox k'u che ri Dios ruma ri nimalaj sapanik uya'om chiqe, ma wa' lik na jinta k'o wi!

## 10

*Ri Pablo kuto'b'ej rib' chikiwach ri kakik'aq b'i uq'ij*

<sup>1</sup> Ri'in in Pablo kuaj kankoj wib' chiwach alaq chupa rub'i' ri Cristo, ri na ku'an ta nim che rib' y lik utz uk'u'x. Ma e k'o jujun chixo'lib'al alaq kech'a't chwij, kakib'i'ij echiri' in k'o uk' alaq, pacha'kanxi'ij wib' kanch'a'b'ej pa alaq; yey echiri' in k'o naj y kintz'ib'an k'u pan uk' alaq, na kanxi'ij ta k'ana wib' kan'an wa', kecha'.

<sup>2</sup> Kantz'onoj k'u che alaq choka alaq il che wa kantz'ib'aj pan che alaq, cha' we xinopon uk' alaq na kajawax ta chik kanch'a'b'ej kipa jujun che alaq. No'j we kajawaxik, kan'an na k'u ri' wa' chike ri kakib'i'ij xa pa qe ri'oj kojtaqanik.

**3** Qatzij, ri'oj xa oj tikawex, pero na kaqa'an ta qe'oj pacha' ri kaki'an ri winaq re ruwachulew.

**4** Ma echiri' kojch'o'jin chirij ri na utz taj, na kaqa'an ta ruk' qachuq'ab' o qana'oj ri'oj, ma e kaqa'an ruk' ruchuq'ab' y ruto'b'al ri Dios cha' jela' kaqasach uwach ronoje ri kayaktaj chirij ri Dios;

**5** wa' e ri itzel taq na'oj y tak'ab'al q'ij, ri keb'uq'atej ri tikawex cha' na kaketa'maj ta uwach ri Dios. Kaqaya k'u ronoje taq no'jib'al puq'ab' ri Cristo cha' ku'an pacha' runa'oj Rire.

**6** Echiri' kaqilo lik kakoq alaq utzij ri Cristo, k'a tek'uchiri' kaqaq'at tzij pakiwi ri e aj palajiy tzij.

**7** Ralaq xew kataqej alaq ri kilitaj uwach. We k'o k'u junq ujikib'am uwach chirib'il rib' lik k'o puq'ab' ri Cristo, e chuch'ob'o chi utz wa': Na xew ta rire k'o puq'ab' ri Cristo, ma jenela' ri'oj.

**8** Y na xew ta ri', ma na kink'ix tane che tob' kanjikib'a' uwach ri taqanik kaqa'an pawi' alaq, ma wa' e ri Qajawal ya'yom paqaq'ab'. Y wa' na re ta sachib'al wach alaq, ma re k'iyib'al alaq chwach ri Dios.

**9** Na kuaj taj kach'ob' alaq raqan e kanxib'ij pa alaq ruk' ri kantz'ib'aj pan che alaq.

**10** Ma k'o keb'i'n re: «Ri Pablo chupa taq rucartas lik k'ax ri kub'i'ij, pacha' lik k'o uchuq'ab'; no'j echiri' k'o chiqawach, kuxi'ij rib' y na il tane uwach ruch'a'tem» kecha'.

**11** Ek'u ri keb'i'n re wa' chirajawaxik kaketa'maj na je ta la' u'anom, ma e janipa ri kaqatz'ib'aj pan che alaq, junam ub'l'i'xikil kaqa'ano echiri' oj k'o chiwach alaq.

**12** Ri'oj na kaqach'ob' tane kaqajunimaj qib'

kuk' ri jujun xa kakitak'ab'a' kiq'ij chikib'il kib'. Ma rike xa kakijunimaj kib' kuk' ri kachb'i'il. Ri keb'anaw re wa', na jusuk' ta ri kina'oj.

**13** No'j ri'oj na kaqatak'ab'a' tane qaq'ij ruma jun a chak na qa'anom taj, ma e kaqa'an ri uya'om ri Dios paqaq'ab'. Yey e Rire ri xuya chiqe xojopon k'a chila' uk' alaq ruk' ri Utzilaj Tzij.

**14** We tamaji e ri Dios ya'yom chiqe kojopon uk' alaq, ri' xa pa qe ri'oj kaqa'an ri chak uk' alaq. Pero na e ta ri'. Lik k'u taqal chiqe kaqapixab'aj pan alaq wo'ora, ma ri'oj oj ri nab'e xojopon uk' alaq ruk' ri Utzilaj Tzij re ri Cristo.

**15** Na kaqatak'ab'a' tane qaq'ij xa pa qe ri'oj ruk' ruchak jun chik. Ri qoye'em e jalan kanimar ri kub'ulib'al k'u'x alaq, jek'ula' kanimar ri qachak chixo'lib'al alaq e chirij ri uya'om ri Dios paqaq'ab'.

**16** Tek'uchiri' we xutzin ri qachak chixo'lib'al alaq, utz k'u ri' kojel b'i y koj'ek pa k'amaja' katzijox wi ri Utzilaj Tzij re ri Cristo, y jela' na ke'qamina ta qib' pa ri chak re jun chik, cha' na kaqatak'ab'a' ta qaq'ij ruk' ri chak na qa'anom ta ri'oj.

**17** China k'u ri karaj kuyak uq'ij,  
e chuq'alajisaj ri' janipa ri u'anom

ri Dios Qajawxel che rub'inik usilab'ik      *Jer.*  
*9:23-24*

**18** Ma we jun kutak'ab'a' uq'ij xa chirib'il rib', ri' na jinta uchak ri ku'ano; no'j we e ri Dios kayakaw uq'ij, e q'alaj ri' utz ri chak u'anom.

<sup>1</sup> Chinkuyu k'ana alaq we kinch'a't k'enoq pacha' junoq ch'u'jerinaq.

<sup>2</sup> Kan'an k'u wa' ma lik k'ax kannaa' alaq, yey wa k'axna'b'al nuk'u'x che alaq e ri Dios kojoyom pa wanima'. Ma ri'in nuya'om alaq puq'ab' ri Cristo y xew puq'ab' Rire kuaj k'o alaq. E pacha' juna achi echiri' kuya rumi'al puq'ab' juna ala pa k'ulanikil. Ri karaj rachi e kuya puq'ab' rala jun saqil q'apoj ali. Jek'ula' ri kuaj ri'in che ralaq e na jinta k'ana ch'ul che alaq chwach ri Cristo.

<sup>3</sup> Lik kub'isoj nuk'u'x ma k'axtaj kak'ulumaj e alaq jela' pacha' ri xuk'ulumaj ri Eva ojertan echiri' xsokotaj rumá ri tzel uno'jib'al ri kumatz. Ma k'axtaj kajalk'ataj ri na'oj alaq, kesaj k'u ib' alaq puq'ab' ri Cristo y na kataqej ta chi alaq ruk' ronoje k'u'x alaq.

<sup>4</sup> Kamb'i'ij wa' ma echiri' kopon junoq uk' alaq, tob' junwi ri tzijonik ku'an puwi ri Jesús chwach ri tzijonik qa'anom ri'oj che alaq, jlik kak'ul k'u alaq ri!! Y kak'ul ne alaq ri petinaq ruk' juna chik uxlاب'ixel, tob' na e ta ri Ruxlab'ixel ri Dios k'ulum chi alaq. Kak'ul ne alaq jun chik tzij, tob' junwi chwach ri Utzilaj Tzij kojom chi alaq.

<sup>5</sup> K'o ri kakib'i'ij e nimaq taq taqo'n yey kaki-tak'ab'a' kiq'ij. ¿K'o neb'a más kiwach rike chin-uwa ri'in? Kanch'ob' ri'in, na jintaj.

<sup>6</sup> Ma tob' na kinch'a't ta ri'in ruk' nimaq taq ch'a'tem pacha' ri kaki'an rike, pero ri'in más k'o weta'am chikiwa rike; y wa' nuk'utum chiwach alaq ruk' ronoje ri nu'anom chixo'lib'al alaq.

<sup>7</sup> Laj k'o ri kakich'ob' raqan na jinta nuwach; ma echiri' xintzijoj ri Utzilaj Tzij re ri Dios che alaq, na xintz'onoj tane k'ana rajil ri nuchak. ¿K'o

neb'a numak ri' chiwach alaq rumá wa'? Ma we xin'an ch'uti'n che wib', e cha' kanimarisax q'ij ralaq chwach ri Dios.

<sup>8</sup> Echiri' ri'in xink'oji' uk' alaq, e jujun chik iglesias ri xkitaq lo puaq chwe. Ek'u xink'am puaq chike rike cha' utz xinq'alajisaj ri Utzilaj Tzij chiwach ralaq.

<sup>9</sup> Ma echiri' in k'o uk' alaq yej k'o k'u xajawax chwe, na jinta xintz'onoj che ralaq. Ri xeto'w we e ri hermanos e petinaq Macedonia. Na jinta k'u xink'am che ralaq ma na xuaj taj xinya alk'ayew che alaq y na kuaj tane kan'an wa' chiqawach apanoq.

<sup>10</sup> Yey paqatzij wi ri Q'ijsaq re ri Cristo pa wanima' k'o wi; rumá k'u ri' kanjikib'a' uwach wa': E na jinta junioq chila' Acaya kesan re ri ki'kotemal kanna'o rumá na kanya ta alk'ayew che alaq.

<sup>11</sup> Chiwach ralaq, ¿sa' nawi ub'e na kantz'onoj ta wajil che alaq? ¿Ruma nawi na k'ax ta kanna' alaq? Na e ta ri', ma ri Dios lik reta'am sa' ri k'o pa wanima'.

<sup>12</sup> Ek'u ri na kantz'onoj ta wajil che alaq, na kanwoq'otaj ta u'anik cha' jela' kaq'alajinik na junam ta kojchakun ri'oj pacha' ri jujun chik, ri kakijunimaj ri kichak ruk' ri qachak ri'oj xa re yakb'al kiq'ij.

<sup>13</sup> Rike xa e sokoso'nel, na e ta saqil taqo'n ma ki'anom che kib' pacha' e taqo'n re ri Cristo.

<sup>14</sup> Makam k'u anima' alaq che wa'; ma jenela' ku'an ri Satanás, ku'an che rib' pacha' e jun ángel re Q'ijsaq.

<sup>15</sup> E uwari'che makam anima' alaq che we ri e aj chak re ri itzel winaq kaki'an che kib' pacha'

e 'anal re ri jusuk!. Pero kopon k'u ri q'ij echiri' kakik'ul na ri tojb'al re ri na utz taj ki'anom.

<sup>16</sup> Jumul chik kamb'i'ij: Mach'ob' alaq we ri'in xinch'u'jerik. Yey we k'o junq che alaq jela' kuch'ob'o, chuya'a luwar chwe kantak'ab'a' k'ana nuq'ij pacha' junq ch'u'jerinaq.

<sup>17</sup> Ri kaqatak'ab'a' qaqq'ij na e ta uk'utu'n ri Qanimajawal chiqe; pero kantak'ab'a' k'ana nuq'ij pacha' junq na jusuk! ta runa'oj.

<sup>18</sup> Lik e k'i ri kakitak'ab'a' kiq'ij ruma ri kaki'an che ruwachulew, yey wo'ora kan'an k'ana we ri'in.

<sup>19</sup> Ralaq lik k'o na'oj alaq; na ruk' ta k'u ri', lik kek'ul alaq ri sachinaq kina'oj.

<sup>20</sup> E kuyum k'u alaq ri' rike tob' lik ketagan paw'i' alaq, kakichap ri e alaq y kakik'is ne rub'itaq e alaq, yey lik kaki'an nim che kib' chiwach alaq. ¡Kuyum ne alaq tob' kakipach' q'ab' chipalaj alaq! Ronoje wa' kuyum alaq y na jintu kab'i'ij alaq che.

<sup>21</sup> Laj k'ixb'al k'u chwe ri'in ma na xinch'ij ta u'anik pacha' ri kaki'an rike.

Pero we rike na kek'ix ta che kakitak'ab'a' kiq'ij, jek'ula' ri' kan'an ri'in, tob' ruk' wa' pacha' in ch'u'jerinaq.

<sup>22</sup> Rike kakitak'ab'a' kiq'ij ma e aj hebreo; jela' ri'in, in aj hebreo yey kanriq ri ch'a'tem hebreo. Rike kaki'an nim che kib' ma e kuk'il ri tinamit re Israel, jela' ri'in in kuk'il ri tinamit re Israel. Rike kakiyak kiq'ij ma e ralk'o'al kan ri Abraham; jela' ri'in, in ralk'o'al kan ri Abraham.

<sup>23</sup> Rike kakib'i'ij e aj chak re ri Cristo, jela' ri'in paqatzij wi in aj chak re ri Cristo yey más nim ri chak nu'anom ri'in chikiwa rike. Tob' kinch'a't

pacha' in ch'u'jerinaq, kamb'i'ij k'u wa': Ri'in más in chakuninaq y más nutijom k'ax chikiwach rike. Ma uk'iyal laj b'alak'um nupa, uk'iyal laj inya'om pa cárcel, uk'iyal laj xtewun ri kamik panuwi'.

<sup>24</sup> Raj judi'ab' wo'ob' laj xkijich' nupa pa treinta y nueve asial.\*

<sup>25</sup> Yey oxib' laj in 'anom pa b'arijon, julaj in 'anom pa'b'aj.\* Oxlaj ya laj in jiq'inaq pa ya' ruma xmuquutaj ri barco in k'o chupa, yey xinch'ij ne jun aq'ab' ruk' jun q'ij in k'o chwi ri mar.

<sup>26</sup> Uk'iyal laj nu'anom unimal b'e. Ya laj in jiq'inaq pa taq nimaya'. Ya laj in kaminaq pakiq'ab' eleq'omab' y pakiq'ab' ri na e ta kuk'il ri nutinamit. Ya laj inkamisam kuma ne ri watz-nuchaq'. Ya laj inkamisam pa taq tinamit, pa taq luwar katz'intz'otik y chwi ri mar. Ya laj ne inkamisam kuma ri kakib'i'ij kub'ul kik'u'x ruk' ri Cristo, tob' wa' na qatzij taj.

<sup>27</sup> Nutijom k'axlaj chak y kosik. Uk'iyal laj nukuyum waram, numik y tzajin chi'. Ruma taq ri lik k'o kan'ano, uk'iyal laj na utz ta chi ne xinwa'ik. Nutijom k'axk'lol tew y xinkanajik na jintu chi ne nuq'u'.

<sup>28</sup> Y xaqi uwi chi wa', ri jujun q'ij lik sa'chi rub'is nuk'u'x kuma taq riglesias; e kanna' ri'in wa' e pacha' jun eqa'n k'o panuwi'.

<sup>29</sup> We k'o junoq k'o pa k'ax y na jintu uchuq'ab', e kanna' ri'in pacha' in ri ink'ulumayom re wa'. We k'o junoq kumin junoq chik pa ri mak, wa' kuya woyowal.

<sup>30</sup> We chirajawaxik k'ut kanyak nuq'ij, ri

---

\* **11:24** Dt. 25:3    \* **11:25** Hch. 14:19

tak'ab'al nuq'ij kan'ano e kantzijoj taq ri kuq'alajisaj, ri'in na jinta nuchuq'ab'.

<sup>31</sup> Ek'u ri Dios, Ruqaw ri Qanimajawal Jesucristo ri na jinta utaqexik nim uq'ij, e eta'mayom re na raq'ub'al ta wa kamb'i'ij.

<sup>32</sup> Tape k'u alaq ri xink'ulumaj Damasco: Ri aj wach k'o chwach ri rey Aretas xtaqan che kikojik e aj chajal re ri tinamit cha' kinkichapo.

<sup>33</sup> Yey rumá k'u ri' xinqasax lo chupa jun nimalaj chakach, ximom lo ruk' lazo chwi jun nimalaj tapia k'o ventana che.

## 12

*Tob' ri Pablo lik utijom k'ax, ruchuq'ab' ri Dios k'o ruk'rire*

<sup>1</sup> Tob' na jinta kutiqoj che junq'ku'an nim che rib', na ruk' ta k'u ri' kantzijoj sa' ruk'utum y ruq'alajisam ri Qajawal chinuwach.

<sup>2</sup> Lik weta'am k'u uwach jun achi uya'om rib' puq'ab' ri Cristo. Ek'u kajlajuj junab' wa' rik'owik echiri' rire xk'am b'i k'a chila' chikaj. Na weta'am ta k'ut we xk'am b'i ruk' rucuerpo o xa e ri ranima' xe'ek, xew ri Dios eta'mayom re.

<sup>3</sup> Xew k'u weta'am xk'am b'i, tob' pacha' ri nub'i'im chik, na weta'am taj we xk'am b'i ruk' rucuerpo o xa e ri ranima' xe'ek, xew ri Dios eta'mayom re.

<sup>4</sup> Ri weta'am, e xk'am b'i chupa ri chomilaj luwar chila' chikaj. Chila' k'u ri' xuta chomilaj taq tzij yey wa' na ya'tal tane k'ana che junq'kutzijoj.

<sup>5</sup> Kamb'i'ij k'u ri', utz kanyak uq'ij ri xilow re y ri xtaw re wa'. Pero we kanyak nuq'ij ri'in, na e ta

kantzijoj ri q'alajisam chwe, ma xew kantzijoj ri k'aqib'al b'i nuq'ij.

<sup>6</sup> Ma we ta kuaj kanyak nuq'ij ruma ruq'alajisam ri Dios chwe, ri' na raq'ub'al ta ri kamb'i'ij, ma lik e ub'e ri'. Pero na kan'an taj, ma na kuaj taj k'o junq kukoj uwi ri ilitajinaq y ri tatajinaq chwe.

<sup>7</sup> Yey cha' na kanyak ta k'u nuq'ij ruma na jinta k'ana k'o wi ri q'alajisam chwe, xya'taj k'u che ri Satanás kukoj jun k'ax che ri nucuerpo pacha' jun a k'iix xaqi kuch'ikich'a' chwe.

<sup>8</sup> Ruma k'u ri', oxlaj xinelaj che ri Qajawal cha' karesaj wa' chwe.

<sup>9</sup> No'j Rire jewa' xub'i'ij chwe: «Ri unimal rutzil nuk'u'x k'o awuk', e wa' ri lik kajawax chawe. Ma ri nuchuq'ab' más kaq'alajin kuk' ri na jinta kichuq'ab'» xcha'. E uwari'che ri'in lik kinki'kot che echiri' na jinta nuchuq'ab', ma jela' e kak'oji' ruchuq'ab' ri Cristo wuk'.

<sup>10</sup> Ruma k'u la', ruk' ki'kotemal kanch'ij taq ri k'ax kape panuwi' ruma in re ri Cristo, tob' na jinta nuchuq'ab', tob' e k'o ri tzel kech'a'l lo chwij, tob' nukuyum nib'a'il, tob' inya'om pa k'ax y pa b'is; ma echiri' kanna'o na jinta nuchuq'ab', e más kanna' ruchuq'ab' ri Cristo k'o wuk'.

<sup>11</sup> Xa uma k'u ralaq xintak'ab'a' nuq'ij pacha' ku'an junq na jusuk' ta runa'oj, pero e ralaq xinminow alaq chupa. Ek'u ri lik usuk' e ralaq ri kayakaw alaq nuq'ij. Ma tob' na jinta nuwach ri'in, pero wa' wa nimaq e taqo'n ri xa kaki'an nim che kib', rike na jinta más kiwach chinuwa ri'in.

<sup>12</sup> Echiri' xinchakun chixo'lib'al alaq, xq'alajin chiwach alaq in utaquo'n ri Cristo. Ma echiri'

xink'oji' uk' alaq, na xinkos ta che uk'utik chiwach alaq taq ri k'utub'al re ruchuq'ab' ri Dios ruk' nimaq taq milagros.

<sup>13</sup> ¿Sa' nawi ri xinjaljob' wi chiwach alaq? ¿Na xin'an ta neb'a che alaq pacha' ri xin'an chike ri nik'aj chik iglesias? Laj e ri xinjaljob' wi ma na xinya ta alk'ayew che alaq rumá na xintz'onoj ta wajil che alaq. We e numak wa', kuyu alaq numak.

### *Ri Pablo kuyib'a' pan ri urox roponib'al Corinto*

<sup>14</sup> Tape alaq: Ri'in nuyib'am chi wib' cha' kino-pon uk' alaq churox laj. Y we xinoponik, na kanya ta alk'ayew che alaq, ma na jintá k'o kantz'onoj che alaq. Ek'u ri kuaj che alaq na e ta ri k'o uk' alaq, ma e ri kak'ut alaq ri rutzil k'u'x alaq chwe. Xew k'u lik kuaj kanto' alaq pacha' ku'an juná achi kuk' ri ralk'o'al. Ma chike ri kichu-kiqaw taqal wi kakitzukuj ri kajawax chike ri ch'uti'q; na e ta ri ch'uti'q ri taqal chike kakitzukuj ri kajawax chike ri kichu-kiqaw.

<sup>15</sup> Ek'u ri'in ruk' ronoje nuk'u'x na xew ta kank'is ronoje ri k'o wuk', ma kanya ne wib' che to'ik alaq ruk' ri k'aslema alaq chwach ri Dios. Pero e kanwil ri'in, echiri' más kank'ut ri k'axna'b'al nuk'u'x che alaq, e más kaq'ob' ri k'axna'b'al k'u'x ralaq chwe ri'in.

<sup>16</sup> Eta'am k'u alaq na xinya ta alk'ayew che alaq. Na ruk' ta k'u ri', e k'o ri kakib'i'ij xinwesaj ne puaq che alaq xa xe'laq'ay.

<sup>17</sup> ¿Su'chak kach'ob' alaq wa'? ¿K'o neb'a juná sokoso'nel nutaqom b'i uk' alaq?

<sup>18</sup> Ri'in xintz'onoj che ri Tito ke'rila alaq y xintaq b'i ri jun hermano ruk'. ¿Xu'an neb'a eleq' ri Tito

che alaq? Rire junam wuk' ri'in xa jun qak'u'x che ri kaqa'ano.

**19** Hermanos, laj kach'ob' alaq e ronoje wa nub'i'im loq xa re to'b'al qib', pero na e ta ri'. Ma paqatzij wi chwach ri Dios y chupa rub'i' ri Cristo qab'i'im lo wa' re to'b'al e alaq, ri lik k'ax kaqana' alaq.

**20** Kub'isoj nuk'u'x ma k'axtaj we xinopon uk' alaq, na utz ta 'anom alaq y jela' k'u ri' na kuk'ul ta nuk'u'x ri ki'nriqa'. Yey we e ri', laj na kuk'ul ta k'u'x alaq ri woponib'al ma ri' yaj ri ki'n'ana'. Kub'isoj k'u nuk'u'x ma k'axtaj k'o ch'a'oj chixo'lib'al alaq, k'o ri k'ax kik'u'x chikij jujun chik, k'o oyowal chiwach alaq, jachom pa alaq, k'o ri kakich'amij kib', k'o ri e aj molot, k'o ri kaki'an nim che kib' yey e k'o ri e soq'osaq e kiwach e tzukul ch'a'oj.

**21** Kub'isoj k'u nuk'u'x ma k'axtaj we xinopon tanchi uk' alaq, laj ki'nriqa' e k'i che alaq k'a e k'o pa mak y na kitzelem ta kitzij chwach ri Dios; ma kaki'an taq ri ch'ulilaj mak, kaketz'ab'ej uwa kiq'ij kuk' jujun chik na kik'ulel taj y kiya'om kib' che u'anik ronoje taq ri rayib'al re ri kiti'jil. We xi'nriqa k'u ri' wa', lik kink'ix chwach ri Dios uma ralaq y keb'enuwoq'ej k'u ri' ri keb'anaw re wa'.

## 13

**1** Rutzij Upixab' ri Dios jewa' kub'i'ij: «We e k'o keb' oxib' kakijikib'a' uwach rumak junoq ma xkilo echiri' kamakunik, kaq'at k'u tzij ri' puwi raj mak.»\* E urox laj wa' kinopon uk' alaq,

---

\* **13:1** Dt. 19:15

**2** ye yey k'o kuaj kamb'i'ij che onoje alaq y chike ri na koq'otam ta kan ri kimak. Wa' e ri nub'i'im chi kan che alaq echiri' xinopon chukalaj uk' alaq y wo'ora kamb'i'ij tanchik tob' na in jinta uk' alaq: We xinopon tanchik, na ki'nto'o ta wi' alaq.

**3** Kank'ut k'u ri' chiwach alaq ri katz'onoj alaq, wa' e ri k'utub'al re we paqatzij wi ri nutzij ri'in e utzij ri Cristo. Ma Rire na kuxi'ij ta rib' ye yey lik k'o uchuq'ab' re kusuk'upij ri b'inik silab'ik alaq.

**4** Paqatzij wi ri Cristo echiri' xkamisax chwa cruz e pacha' na jinta uchuq'ab', pero wo'ora Rire k'aslik ruma ruchuq'ab' ri Dios. Jek'uri'la' we ri'oj xa jun qa'anom ruk' ri Cristo, e pacha' na jinta qachuq'ab' ruma ri k'ax kaqatiyo, no'j kojk'asi' ruma ruchuq'ab' ri Dios k'o quk' ye yey kaqak'ut na k'u ri' wa chuq'ab' echiri' kojopon uk' alaq.

**5** Ch'ob'o alaq raqan we paqatzij wi k'o k'utub'al re ri kub'ulib'al k'u'x alaq ruk' ri Qanimajawal Jesucristo y k'o k'u alaq puq'ab' Rire. ¿Na eta'am ta neb'a alaq Rire k'o pa anima' alaq? ¿O k'axtaj na jinta ne k'ana k'utub'al re wa' chupa ri b'inik silab'ik alaq?

**6** Ek'u kuaj ri'in keta'maj alaq wa': Che ri qab'inik qasilab'ik kaq'alajinik k'o ri Cristo pa qanima' y Rire kaki'kot ruk' ri qa'anom.

**7** Kaqatz'onoj k'u che ri Dios cha' ralaq na katzaq ta k'ana alaq chupa ri na utz taj. Na kaqatz'onoj ta wa' re yakb'al qaq'ij ri'oj, ma xew kaqaj ka'an alaq

ri utz, tob' e k'o ri kakik'aq b'i qaq'ij ri'oj.\*

<sup>8</sup> Ma ri'oj na jinta paqaq'ab' kaqak'aq b'i kiq'ij ri keb'in chupa ri Q'ijsaq. Ri kaqa'ano e kojchakun ne rumá ri Q'ijsaq cha' konoje keb'in chupa.

<sup>9</sup> E uwari'che lik kojki'kot che we kak'oji' chuq'ab' ralaq che u'anik ri utz, tob' kilitaj k'ut pacha' e na jinta chi qachuq'ab' ri'oj. Kaqatz'onoj k'u che ri Dios cha' e kuchomaj chi utz ri b'inik silab'ik alaq.

<sup>10</sup> Ruma k'u wa', kintz'ib'an apanoq xaloq' k'amaja' kinopon uk' alaq, cha' we xinoponik, na kajawax ta chi k'ax kinch'aw pawi' alaq. Ma ri chak uya'om ri Dios chwe e re k'iyib'al alaq, na re ta sachib'al wach alaq.

### *K'isb'al uch'a'tem ri Pablo che riglesia k'o Corinto*

<sup>11</sup> K'isb'al k'u re hermanos, kamb'i'ij wa' che alaq: K'ola ki'kotemal pa anima' alaq, suk'upij ri b'inik silab'ik alaq chwach ri Dios, nimarisaj k'u'x alaq chiwach alaq, chu'ana xa jun k'u'x alaq y k'ola alaq chi utzil chomal. Y ek'u ri Dios, ri aj ya'l utzil chomal y rutzil k'u'xaj, kak'oji' uk' alaq.

<sup>12</sup> Ya'a rutzil wach alaq chiwach alaq ruk' jun saqil tz'ub'uj chi'aj chwach ri Dios.†

<sup>13</sup> Konoje ri hermanos wara kakiya pan rutzil wach alaq.

---

\* **13:7** "Tob' e k'o ri kakik'aq b'i qaq'ij ri'oj": We ri aj Corinto kakiyib'a' kib', na kajawax ta chik kaq'at tzij pakiwi!. We jek'ula' ri' xu'anó, laj e k'o jujun kakib'i'ij na jinta uchuq'ab' ri Pablo ma na xuq'at ta tzij pakiwi' jela' pacha' ri ub'l'im loq. † **13:12** Ri Pablo jewa' xub'i'ij ma rike e kaki'an wa' chikiwach echiri' kakiya rutzil kiwach.

**14** K'ulu k'u onoje alaq ri unimal rutzil uk'u'x ri Qanimajawal Jesucristo y ri rutzil uk'u'x ri Dios, yej chu'ana xa jun k'u'x alaq ruma ri Santowilaj Ruxlab'ixel. Amén.

**Ri utzilaj tzij re ri kanimajawal Jesucristo  
New Testament in Achi Rabinal; acr (GT:acrN:Achi)**

copyright © 2009 Wycliffe Bible Translators, Inc.

Language: Achi

Dialect: Rabinal

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Achi

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xl

2014-04-18

---

PDF generated using Haiola and XeLaTeX on 18 Apr 2025 from source files  
dated 31 Aug 2023

c47d5e0e-42c2-5f90-9b73-ce40b05f740d